

25 JAN 1996

YANG DI-PERTUAN AGONG UCAP TAHNIAH KAPADA GABENOR-JENERAL AUSTRALIA

KUALA LUMPUR, 25 Jan (Bernama) -- Yang di-Pertuan Agong Tuanku Ja'afar hari ini mengucapkan tahniah kepada Gabenor-Jeneral Australia Bill Hayden sempena dengan Hari Australia negara itu.

"Semoga hubungan persahabatan dan kerjasama antara kedua-dua negara terus dipertingkatkan pada tahun-tahun akan datang," titah Seri Paduka dalam perutusan tahniah yang dikeluarkan oleh Wisma Putra di sini.

Perdana Menteri Datuk Seri Dr Mahathir Mohamad dalam perutusan yang serupa kepada rakan sejawatannya, Paul Keating berkata lawatan Perdana Menteri Australia itu ke Malaysia baru-baru ini telah mempereratkan hubungan baik kedua-dua negara.

"Saya yakin Australia akan terus mencapai pertumbuhan ekonomi yang membanggakan dan kemakmuran yang lebih lagi pada tahun-tahun depan," kata beliau dalam perutusannya.

Pemangku Menteri Luar Datuk Abu Hassan Omar dalam perutusan tahniah kepada Menteri Luar Australia Senator Gareth Evans berharap hubungan persahabatan dan kerjasama antara kedua-dua negara akan terus diperkukuhkan pada tahun-tahun akan datang. -- BERNAMA